

Les Reussilles – Haut de Bémont, 24.10.2024

D Gaffeemaschine het ordeli gha z röhre im Tea Room in Les Reussilles bis aui 19ni vo üsere Gruppe ihre Gaffee, Tee oder Ovo vor sech hei gha. Mit emne Gipfeli hei mir üs no chönne sterche, bevors losgange isch Richtig Haut de Bémont.

Ungerwägs hets gäng öppe wieder grösseri oder chlineri Lücke gäh i üsere Marschformation – me het schliesslich die wunderbar farbigi Herbschstimmig i dere idrückliche Juralandschaft o müesse uf em Handy feschthaute. O hei no rächt viu Ross, Gushti u Chüe uf de Matte gweidet, was o schöni Fotosujet gäh het. Näbe abglägene Burehöf düre si mir schliesslich zu üsem Ziel u glichzeitig o üsere Mittagsrascht cho: Haut de Bémont.

Lut üsem Toureleiter Georg hätte mir jetz hie e wunderbari Sicht söue ha uf üsi Bärner Aupe. Leider aber mit Betonig uf «hätte», denn Eiger, Mönch, Jungfrou und Co. hei sich hinger es paar Wouche versteckt. D Wouche si o uf üsere witere Wanderig es Thema gsi: u zwar dunkli, schwarzi, wo üs zeigt hei, dass mir dr Rägeschirm nid vergäbe mitgnoh hei.

Uf emne gäbige Wägli über ne Grat isch es wieder zrugge gange nach Les Reussilles. Bim ne Abschlusstrunk, zum Teil versüesst mit Vermicelles, hei mir die schöni Wanderig lo usklinge.

Merci Georg für die tiptopi Organisation a däm schöne Tag.

Peter Kohler